

毛

詩

釋

地

毛詩釋地卷之一

經學叢書之三

南海桂文燦

周南 召南

周南召南

鄭氏譜周召者禹貢雍州岐山之陽地名今屬右扶風美陽縣地形險阻而原田肥美周之先公曰太王者避狄難自豳始遷焉而修德建王業商王帝乙之初命其子王季爲西伯至紂又命文王典治南國江漢汝旁之諸侯於時三分天下有其二以服事殷故雍梁荆豫徐揚之人咸被其德而從

之文王受命作邑於豐乃分岐邦周召之地爲周公旦召公奭之采地施先公之教於已所職之國武王伐紂定天下巡守述職陳誦諸國之詩以觀民風俗六州者得二公之教尤純故獨錄之屬之大師分而國之其得聖人之化者謂之周南得賢人之化者謂之召南言二公之德教自岐而行于南國也

公羊隱公五年傳自陝而東者周公主之自陝而西者召公主之何注陝蓋今宏農陝縣是也說文陝宏農陝也古虢國王季之子所封也

後漢郡國志美陽有周城陝縣有陝陌二伯所分水經陝縣故城注周召分伯以此城爲東西之列括地志周城一名美陽城在雍州武功縣西北二十五里卽太王城也陝原在陝州陝縣西南二十五里分陝從原爲界

案漢右扶風美陽縣地今爲陝西鳳翔府岐山扶風二縣也今扶風縣東爲武功縣縣西北有周城太王邑于岐山之下卽此宏農陝縣今河南陝州直隸州廢陝縣是也廢縣西南二十五里有陝原二伯所分卽此鄭譜云雍梁荊豫徐

揚之人咸被文王之德而從之雍州今爲陝西
之西安同州鳳翔延安榆林甘肅之蘭州平涼
鞏昌慶陽甯夏西甯涼州甘州鎮西十四府乾
州邠州興安邠州綏德肅州迪化安西八州洮
州一廳漢中府除鳳縣秦州除兩當爲梁州餘
皆雍州其在化外南至西傾積石北至沙漠梁
州今爲陝西漢中府之南境及興安南州甘肅
鞏昌府之南境及階州秦州湖北之鄖陽府四
川全省及雲南貴州北境荊州爲今湖北漢陽
安陸黃州德安荊州宜昌施南等府及襄陽之

南境湖南全省及四川敘州重慶夔州等府之
江南地廣西桂林貴州遵義等府豫州爲今河
南州河南開封陳州歸德南陽汝甯六府許陝
汝光四州及直隸大名府西北境山東曹州府
東南境江南潁州府之西境湖北襄陽德安二
府之北境鄖陽府之東境徐州爲今江南徐州
府泗州海州及鳳陽淮安二府北境山東兗州
沂州二府濟甯州泰安府南境曹州府東南境
揚州爲今江南江蘇安徽兩省及江西浙江西
則河南之汝甯湖北之黃州等府自陝以東蓋

徐揚二州及豫州東北境荊州東境乃今河南省之河南開封陳州歸德南陽汝甯六府汝許光三州及直隸省之大名府西北境山東省之兗州沂州二府濟甯州泰安府南境曹州府東南境湖北省之武昌漢陽襄陽德安安陸黃州荊州七府及荊門州湖南省之長沙岳州衡州三府及澧州郴州桂陽三州及江南江西浙江三省皆周公主之者也自陝以西蓋雍梁二州及荊州西境豫州西南境乃今河南省陝州屬之閩鄉靈寶盧氏三縣湖北省之鄖陽宜昌施

南三府湖南省之常德永順辰州永州寶慶五府乾州晃州靖州三州陝西甘肅四川三省及雲南貴州廣西三省北境皆召公主之者也

河洲

周南關雎在河之洲

傳水中可居曰洲

案公羊傳云自陝而東者周公主之自陝而西者召公主之注陝蓋今宏農陝縣是也而今河南陝州之北正臨大河則經云河洲乃大河之洲或以爲北方流水之通名殆非也

南有樛木

樛木南有樛木

傳南南土也箋南土謂荆揚之域

案禹貢荊州之域乃今湖南湖北及貴州廣西
北境揚州之域乃今江南江西浙江之地也

漢江

漢廣漢之廣矣江之永矣

漢地理志蜀郡湔氐道禹貢嶧山在西徼外江水
所出東南至江都入海過郡七行二千六百六十
里

案今江水出四川松潘廳羊膊嶺南流至四川
敘州府又東流至江西九江府又東北流至江
蘇通州入海志文二千說文繫傳引作七千是
也

漢志隴西郡西禹貢嶓冢山西漢所出南入廣漢

白水

六字疑
衍文

東南至江州入江過郡四行二千七

百六十里

案今西漢水甘肅秦州嶓冢山西南流又東南

流至徽縣及徽縣以南之嘉陵江也南流至四

川巴縣入江

漢志武都郡沮沮水出東狼谷南至沙羨南入江
過郡五行四千里荊州川隴西郡氏道禹貢養水
所出至武都爲漢武都郡武都東漢水受氏道水
一名沔過江夏謂之夏水入江

案沮水今陝西沔縣上沮水出縣北境山下流
爲東漢水東南流至湖北江夏縣入江養水今
甘肅秦州黑峪江也今黑峪江不與東漢水通
流志云養水至武都爲漢又云東漢水受氏道
水皆存禹貢故道耳漢時東漢水已不受氏道
水故於沮縣下以沮水爲其源也夏水者漢水

支流今漢水至湖北潛江縣漢川縣沔陽州支
分南出交絡爲邈邈湖赤野湖沙湖皆東流入
江

汝墳

汝墳遵彼汝墳

傳汝水名也

漢地理志汝南郡定陵高陵山汝水出東南至新
蔡入淮過郡四行千三百四十里

案今汝水出河南嵩縣西南境山此定陵當近
今嵩縣也汝水自嵩縣東南流至郟城縣皆故

道其下古今異流攷漢志瀾水至上蔡入汝以
水經證之汝水自鄆縣過上蔡平輿二縣以今
地攷之自今鄆城縣漢鄆縣過上蔡縣漢上蔡縣汝陽
縣今已湮矣其下流則今汝陽以東之南汝河
也東流至安徽阜陽縣入淮此汝水源流古今
變遷之異也傳以墳爲大防今不能實指其所
在矣

南山

召南草蟲陟彼南山

傳南山周南山也

殷其雷在南山之陽

傳山南曰陽

案南山終南山也左氏傳又作中南漢志則以爲太一此山橫亘關中以南西起秦隴東徹藍田凡今雍岐鄠鄠長安萬年諸縣相去八百餘里連縣峙據其南者皆此山也此山雖廣然太一一峰最高故漢志以太一當之

江有汜

江有汜江有汜

爾雅水決復入爲汜

水經夏水出江流於江陵縣東南注云江津豫章口東會中夏口是夏水之首江之汜也

漢地理志華容夏水首受江東入沔行五百里

案今湖北江陵縣東南境紅馬湖出自大江東岸之郝穴漢時蓋於此受江者今不受江與古異也東流與邇邇湖沙湖合漢志旣云東漢水謂之夏水又於此云夏水首受江明夏水爲江與漢之支分非一源也此云入沔者與沔水之支流合也

江有渚

江有渚

卷一

傳渚小洲也水枝成渚

韓詩章句一溢一否曰渚

爾雅水中可居者曰洲小洲曰階

左氏文十年傳王在渚宮注小洲曰渚正義渚宮當郢都之南

案楚之郢都今湖北江陵縣也江陵正當大江
北岸其南故爲渚宮也

江有沱

江有沱

爾雅水自江出爲沱

漢地理志蜀郡汶江沱在西南東入江

案今四川雜谷廳孟董溝東南流入江今此水自江水分出之處已湮矣

漢志蜀郡郫禹貢江沱在西東入大江

案今江水自四川灌縣分二派南一派過溫江縣雙流縣新津縣者大江正流也此江沱則西南一派過崇慶州至新津縣復合也

漢志南郡枝江江沱出西東入江

案今湖北枝江縣江中有洲分江水爲二東流

復合是也漢志蜀郡之江沱於禹貢屬梁州南
郡之江沱於禹貢屬荊州公羊傳言自陝以東
周公主之自陝以西召公主之今四川雜谷廳
及灌縣溫江雙流等縣固在河南陝州之西卽
湖北枝江縣亦適當陝州以西詩之江沱無由
定其爲梁州抑爲荊州也且詩之江沱與汜渚
並言而曰有汜有渚有沱乃詩人約略之詞在
詩人之意亦未嘗切指其處與禹貢梁荆分紀
異也必求其地以實之鑿已

邶 鄘 衛

邶鄘衛

漢地理志河內本殷之舊都周既滅殷分其畿內
爲三國詩風邶鄘衛國是也邶以封紂子武庚庸
管叔尹之衛蔡叔尹之以監殷民謂之三監故書
序武王崩三監畔周公誅之盡以其地封弟康叔
號曰孟侯以夾輔周室遷邶鄘之民于雒邑故邶
鄘衛三國之詩相與同風又云河內朝歌縣紂所
都康叔所封更名衛

鄭氏譜邶鄘衛者商紂畿內方千里之地其封域
在禹貢冀州大行之東北踰衛漳東及冀州桑土

之野周武王伐紂以其京師封紂子武庚爲殷後
庶殷頑民被紂化日久未可以建諸侯乃三分其
地置三監使管叔蔡叔霍叔尹而教之自紂城而
北謂之邶南謂之鄘東謂之衛

說文邶故商邑自河內朝歌以北是也

通典衛州新鄉縣西南三十二里有鄘城卽鄘國
左傳祝佗曰分康叔封畛土略自武父以南及圃
田之北境封于殷墟

案今河南衛輝府東北有故邶城府城西又有
故鄘城有庸水出宜蘇山衛輝府淇縣東北有

朝歌故城卽衛康叔始封之地後戴公廬漕乃
今衛輝府滑縣地縣東六十里有衛南故城爲
衛楚邱文公遷都於此

漕

邶風擊鼓土國城漕

左氏閔公二年傳立戴公以廬於漕注衛下邑正
義當在河東近楚邱

通典滑州白馬縣衛國曹邑戴公廬于曹卽此

案今河南衛輝府滑縣南二十里白馬城是其
地也

陳 宋

平陳與宋

鄭氏譜陳者太皞虞戲氏之墟帝舜之冑有虞闕
父者爲周武王陶正武王賴其利器用與其神明
之後封其子鳩滿于陳都宛邱之側是曰陳胡公
以備三恪妻以元女大姬其封域在禹貢豫州之
東其地廣平無名山大澤西望外方東不及明豬
漢地理志梁國睢陽縣故宋國微子所封本關伯
之墟

通典陳州宛邱縣陳都

案陳國故城今爲河南陳州府治淮甯縣地宋國故城今爲河南歸德府治商邱縣漢睢陽故城當在縣南也

寒泉 浚

凱風爰有寒泉在浚之下

靡風干旄在浚之郊

水經注濮水枝津東逕浚城南而北去濮陽三十里城側有寒泉岡卽詩爰有寒泉在浚之下世謂之高平渠非也

通典寒泉在濮州濮陽縣東南浚城

案濮陽今山東曹州府濮州也濮水逕其南其
卽今之魏河矣魏河源出直隸大名府開州經
濮州南東北流與運河合寒泉與浚蓋並在其
側也

涇 渭

谷風涇以渭濁

周禮職方氏其川涇汭其浸渭洛注涇出涇陽漢
地理志安定郡涇陽并頭山在西禹貢涇水所出
東南至陽陵入渭過郡三行千六十里雍州川隴
西郡首陽禹貢鳥鼠同穴山在西南渭水所出東

至船司空入河過郡四行千八百七十里雍州浸
案今涇水出甘肅平涼縣西北四十里有崆峒
山卽并頭山也涇水出山之涇谷經涇州又經
陝西邠州長武縣至西安府高陵縣西南二十
里入渭渭水出甘肅涇源縣烏鼠山經鞏昌府
又經甯遠縣伏羌縣秦州山西寶雞縣郿縣陂
厓縣咸陽縣高陵縣涇水從北來注之又經渭
南縣至華陰縣入河

黎

式微序黎侯寓衛勸以歸也

箕黎侯在衛西今所寓在衛東

說文黎國在上黨東北

通典潞州上黨縣古黎侯國西伯戡黎卽此漢爲
壺關縣

案漢志上黨壺關應劭注曰黎侯國也今黎亭
是與許說合今山西潞安府府治卽漢壺關縣
地府西南三十五里有黎亭

中露 泥中

胡爲乎中露

傳中露衛邑也

胡爲乎泥中

傳泥中衛邑也

水經河水又東北過黎陽縣南注黎侯國也詩式微黎侯寓於衛是也又瓠子河注瓠河又東逕黎縣故城南王莽改曰黎治矣孟康曰今黎陽也薛瓚言按黎陽在魏郡非此黎縣也世謂黎侯城昔黎侯陽寓于衛詩所謂胡乎泥中毛云泥中邑名疑卽此城也土地汙下域居小阜魏濮陽郡治也郡縣志黎邱在鄆城縣西四十五里黎侯寓于衛因以爲名

案漢地理志黎縣屬東郡爲今直隸大名府開州地泥中在開州與黎陽屬魏郡爲今河南衛輝府濬縣地濬縣之東卽開州之西二者皆衛地皆以黎侯寓此得名薛瓚言黎陽非黎縣是也孟康謂黎陽卽黎縣失之至鄆城縣今屬山東曹州府爲漢東郡壽良縣地春秋時爲魯國西境此別是一黎非黎侯所寓之地鄒縣志說尤失之

旄丘

旄丘旄丘之葛兮

傳前高後下曰旄丘

爾雅釋丘前高旄丘注引此詩

寰宇記旄丘在澶州臨河縣東

案今在直隸大名府開州也

泉水 淇水 肥泉 泉源

泉水泌彼泉水亦流于淇我思肥泉

衛風竹竿泉源在左淇水在右淇水在右泉源在左

傳淇水名也所出同所歸異爲肥泉

爾雅釋水歸異同流肥注引此傳

漢地理志河內郡共縣北山淇水所出東至黎陽

入河上黨郡壺關沾水東至朝歌入淇

水經注泉源水有二源一水出朝歌西北又東與左水合謂之馬溝水又美溝水出朝歌西北大嶺下更出逕駱駝谷于中逶迤九十曲故俗有美溝之目歷十二嶠嶠流相承泉響不斷

案泉水卽肥泉亦卽泉源皆今河南輝縣百泉水也百泉水出蘇門山卽漢之北山也今百泉水出蘇門山南流至輝縣南分東西二派一派今日衛河東流經今新鄭汲縣北淇縣南今之淇河自北來會之又東北流經濬縣內黃縣西

又東北入運河一派今日小丹河西流經今獲
嘉縣北修武縣南西注大丹河入沁河此毛傳
爾雅所謂出同歸異曰肥泉也東派衛河西派
小丹河古皆謂之淇水經曰源泉在左淇水在
右在右之淇水謂今之小丹河也若謂在右之
淇水屬今之衛河言則詩人當日泉源在右淇
水在左已今淇縣爲古朝歌縣地今之淇河源
出太行山又一派今日淇泉在其南竝東流經
今淇縣北屈南流經今淇縣東入今衛河此蓋
漢志沾水卽水經注之馬溝水美溝水也邵二

雲郝蘭皋乃以馬溝水美溝水當肥泉又謂酈道元以所出異所歸同爲肥義本舍人與郭說異夫天下之水多矣何水非異出同歸乎豈皆得名爲肥乎斯不然矣惟同源異流之水世罕有之故爾雅特著其名耳此釋名所謂源本同出分枝散而多似肥者也

沛 禍

出宿于沛飲餞于禍

傳沛禍地名箋所嫁國適衛之道所經

漢地理志河東郡垣禹貢王屋山在東北沅水所

出東南至武德入河軼出滎陽北地中又東至琅槐入海過郡九行千八百四十里東郡臨邑有沛廟

寰宇記大禰溝在曹州冤句縣北七十里

案濟水出今河南濟源縣王屋山東南流至武陟縣入河臨邑故城在今山東茌平縣東與冤句之大禰溝皆非衛地也沛禰傳竝以爲地名

蓋衛近郊之地禰釋文引韓詩作坭廣韻坭地

名字通作泥鄭注士虞禮引詩飲餞于泥

今本亦作

禰釋文禰疑禰卽式微之泥中也在今直隸開

州南

干言

出宿于干飲餞于言

傳干言所適國郊也

漢地理志東郡有發干縣

續漢書郡國志東郡衛國有干城

隋志九域志邢州內丘縣有干言山

水經注泝水又東南經干言山

案漢發干縣故城在今山東堂邑縣西南五十里按下文云過臻于衛則干言自非衛地不得

以東郡之發干當之惟水經注泝水又東南逕
干言山隋志邢州內丘縣有干言山御覽引李
公緒紀柏人縣有干山言山蓋柏人與內丘連
界今直隸順德府唐山縣西北有干言山延袤
數十里西連內丘縣界者是也

須 漕

思須與漕

傳須漕衛邑也

漢地理志陳畱郡封丘濮渠水首受泝東北至都
關入羊里水過郡三行六百三十里

水經注濮渠東逕須城北詩思須與漕漕卽漕邑
案濮渠水今河南封丘縣沙河也縣南黃河爲
漢時沛瀆今沙河不受黃河與古異也東北流
經直隸長垣縣東明縣至山東濮州與魏河合
羊里水卽魏河也濮渠水東逕須城北須城蓋
在今直隸大名府長垣縣境也王氏地理考以
漢志東郡須昌縣故須句國爲須地按今山東
泰安府東平州東南有須句故城今東平州春
秋時屬魯不屬衛王氏似誤也

新臺

新臺新臺有泚

水經河水注河水又東逕鄆城縣北故城在河南十八里河之北岸有新臺鴻基層廣高數丈衛宣公所築

寰宇記新臺在濮州鄆縣東北十七里北去河四里

輿地廣記開德府觀城縣有新臺

通典魏州黃縣有新臺

案鄆城今山東濮州也觀城縣屬濮州唐黃縣爲今山東冠縣春秋時晉邑通典之說失之鄆

注言新臺在鄆城北岸明正統中鄆城故城爲河所圯新臺故跡今不可考矣

沫

鄆風桑中沫之鄉矣

傳沫衛邑

尙書酒誥明大命于妹邦馬注妹邦卽牧養之地鄭注妹邦紂之都所處也于詩國屬鄆故其風言有沫之鄉則沫之北沫之東都歌也

案今河南衛輝府淇縣北有妹鄉

桑中

期我乎桑中

正義譜云東及兗州桑土之野今濮水之上地有桑閒濮陽在濮水之北是有桑土明矣

尙書禹貢桑土既蠶鄭注其地尤宜蠶桑因以名之今濮水之上地有桑閒者

禮記樂記桑閒濮上之音亡國之音也注桑閒在濮陽南

案濮陽今山東曹州府濮州也濮水今曰魏河鄭云桑閒在濮陽南是桑中在今濮州境也

上宮

要我乎上宮

通典衛州衛縣有上宮臺

案唐衛縣今河南衛輝府淇縣也上宮臺蓋在縣境

楚宮 楚室

定之方中序文公徙居楚丘始建城市而營宮室作于楚宮作于楚室

傳楚宮楚丘之宮也仲梁子曰初立楚宮也筭魯僖二年齊桓公城楚丘封衛楚丘謂宗廟也楚室居室也君子將營宮室宗廟爲先廡庫爲次居室

爲後

鄭志張逸問楚宮今何地荅曰楚丘在濟河閒疑在今東郡界

漢地理志齊桓公更封衛於河南曹楚丘而河內殷虛更屬于晉

通典滑州衛南縣衛文公遷楚丘卽此城

案今河南衛輝府滑縣東六十里隋衛南縣廢縣卽古楚丘城也隋初置楚丘縣後改衛南縣今省入白馬縣明又省入滑縣

堂

望楚與堂

傳楚丘有堂邑者

春秋僖二年城楚丘左氏傳諸侯城楚丘而封衛焉注衛邑

案古楚丘城在今河南滑縣東六十里堂邑當在今滑縣境矣或乃以今山東堂邑縣當之堂邑縣今屬東昌府春秋時屬齊國非衛地在今滑東北三百餘里非目力所能及無由望見非也

景山

景山與京

商頌殷武陟彼景山

傳曰景山太山

水經注河水分濟北逕景山東又北逕楚丘城西
寰宇記景山在澶州衛南縣東南三里

案今河南衛輝府滑縣東六十里有隋衛南廢
縣是景山在今滑縣境也左氏昭三年傳商湯
有景亳之命杜謂亳卽偃師或乃謂偃師縣南
二十里有景山攷今偃師縣西十里尸鄉亭爲
西亳春秋時屬鄭地蓋非也

許

衛風載馳許人尤之

漢地理志潁川許縣故許國

案今河南許州治東三十里有故許城卽新設
石梁縣治也春秋成公十五年許靈公畏楚遷
于葉鄭有其地仍謂之舊許襄公十一年諸侯
伐鄭東侵舊許卽此

邢

碩人邢侯之姨

漢地理志越國襄國縣故邢國

案漢襄國故城今在直隸順德府邢臺縣西南

譚

譚公維私

春秋莊十四年齊師滅譚注譚國在濟南平陵縣西南

案今山東濟南府歷城縣東南七十里有譚城
河水

河水洋洋北流活活

尚書禹貢東過洛汭至于大伾北過絳水至于大
陸又北播爲九河同爲逆河入于海

案禹河故道自大伾以後皆北流入海以今地攷之自河南濬縣至臨漳縣境今濬縣之衛河蓋其故瀆其過臨漳境者今已湮自臨漳以北則漢時漳水所行至今直隸冀州又東北則漢漢時寢水及虋池河所行又東北分爲九派至至今天津縣入海此北流之河在齊衛之間自齊適衛故渡河而詠嘆也

頓丘

氓至于頓丘

漢地理志東郡頓丘縣

案今直隸大名府清豐縣卽其地也

復關

以望復關

傳復關君子所近也

寰宇記澶州臨河縣復關城在南黃河北阜也復關隄在南三百步黎陽下入清豐縣界

案古臨河縣今直隸大名府開州也復關蓋在州境已

狄人

木瓜序美齊桓公也衛國有狄人之敗出處於漕齊

桓公救而封之遺之車馬器服焉衛人思之欲厚報之而作是詩也

爾雅釋地九夷八狄七戎六蠻謂之四海又八蠻在南方六戎在西方五狄在北方李巡云五狄者一曰月支二曰穢貊三曰匈奴四曰獫狁五曰白屋

說文狄赤狄也狄之爲言淫辟也从犬亦省聲

案狄類有五而侵衛之狄則潞子乃赤狄別種今山西之潞城黎城襄垣三縣河南之武安涉二縣直隸之沙河永平雞澤三縣皆其故土也

南與衛鄰故遷都以避之

毛詩釋地卷一

毛詩釋地卷二

經學叢書之三

南海桂文燦

王

王風

鄭氏譜王者周東都王城畿內方六百里之地其封域在禹貢豫州太華外方之間北得河陽漸冀州之南始武王作邑於鎬京謂之宗周是爲西都周公攝政五年成王在豐欲宅洛邑使召公先相宅旣成謂之王城是爲東都今河南是也

漢地理志周地今之河南雒陽穀城平陰偃師鞏

緱氏是其分也

案平王遷都王城今河南洛陽縣西河南故城是也敬王又遷成周今河南洛陽縣東洛陽故城是也二故城東西相去四十里

申甫

揚之水不與我戍申不與我戍甫

傳申姜姓之國平王之舅甫諸姜也

國語鄭語史伯曰當成周者南有申呂周語富辰曰齊許申呂由大姜

尚書呂刑禮記孝經竝引作甫刑

史記謂甫侯言于王作修刑辟是呂卽甫也鄭康成曰呂侯受王命入爲三公

漢地理志南陽郡宛縣故申伯國

括地志故呂城在鄧州南陽縣西徐廣云呂在宛縣水經注宛西呂城四嶽受封于呂

案今河南南陽府南陽縣北有故申城申呂漢皆爲宛縣地卽今之南陽縣也

畱

丘中有麻彼畱子嗟

傳畱大夫氏

曹氏曰畱本邑名其大夫以爲氏

左氏隱十一年傳王取鄆劉蔿之田于鄭注鄆
劉二邑在河南緱氏縣西南有鄆聚西北有劉亭
案畱與劉古字通詩之畱當卽左傳之劉也緱
氏縣今河南偃師縣也

鄭

鄭風

鄭氏譜初宣王封母弟友於京周畿內咸林之地
是爲鄭桓公今京兆鄭縣是其都也又爲幽王大
司徒甚得周眾與東土之人問于史伯曰王室多

故余懼及焉其何所而可以逃死史伯曰其濟洛
河潁之間乎是其子男之國虢郇爲大虢叔恃勢
郇仲恃險皆有驕侈怠慢之心加以貪冒君若以
周難之故寄帑與賄不敢不許是驕而貪必將背
君君以成周之眾奉詞伐罪無不克矣若克二邑
鄆蔽補丹依疇革華君之土也修典刑以守之惟
是可以少固桓公從之言然之後三年幽王爲犬
戎所殺桓公死之其子武公與晉文侯定平王于
東都王城卒取史伯所云十邑之地右洛左濟前
莘後河食溱洧焉今河南新鄭是也

漢地理志鄭國今河南之新鄭本高辛氏火正祝融之虛也及成皋滎陽潁川之崇高陽城皆鄭分也

括地志鄭故城在華州鄭縣西北三里桓公友之邑秦縣之

案漢京兆鄭縣今陝西同州府華州是也歷代有鄭縣元省入華州故城在今州西北三里漢河南新鄭今河南許州屬新鄭縣是也

祭

將仲子將仲子兮

傳仲子祭仲也

括地志故祭城在鄭州管城縣東北十五里鄭大夫祭仲邑

水經注長垣縣有祭城祭仲之邑

左氏桓十一年傳祭封人仲足注陳畱長垣縣東北有祭城

案括地志以管城之祭地爲祭仲邑路史則以管城之祭爲周祭伯采地或疑鄭并祭以封仲攷隱元年祭公來桓八年祭公逆王后于紀莊二十三年祭叔來聘祭未嘗滅也鄭安得取以

封仲乎蓋鄭國自有祭邑不在畿內今案祭地
有三一爲直隸大名府長垣縣之祭城一爲管
城之祭城管城今爲鄭州一爲開封府中牟縣
之祭亭長垣去鄭遠衛之匡蒲宛濮皆在其縣
地當屬衛鄭何能有其地以封祭仲杜說非也
路史以管城之祭爲祭伯采地其說長矣蓋鄭
州近王畿也但其後鄭亦并之耳中牟正爲鄭
地祭仲之邑當在此

京

叔于田序刺莊公也叔處于京繕甲治兵以出于田

國人說而歸之

左氏隱元年傳請京使居之注鄭邑今滎陽京縣
公羊穀梁春秋襄十一年同盟於京城北

漢地理志河南郡京縣卽共叔段所居

括地志京縣故城在鄭州滎陽縣東南二十里鄭
之京邑

案今河南開封府滎陽東南二十里有京故縣
城是也春秋襄十一年京城左氏作亳城亳在
今河南偃師縣乃殷之舊都去鄭境遠當時爲
周地諸侯豈越鄭而盟于此故今據公穀以爲

證也

彭 消 軸 河上

清人清人在彭清人在消清人在軸河上乎翱翔

傳清邑也彭衛之河上鄭之郊也消軸河上地也
箋清者高克所帥眾之邑也正義禦敵於境在鄭
衛境上翱翔河上是迎軍近河而衛境亦至河南
續郡國志河南中牟縣有清水口

水經注渠水又東清池水注之清池水出清陽亭
西南平地東北流逕清陽亭南東流卽故清人城
也詩清人在彭彭爲高克邑杜預春秋釋地云中

牟縣西有清陽亭是也清水又屈而北流至清口
驛七虎澗水注之下又云期水北與七虎澗合逕
期城北東會清口水

案中牟縣在今河南開封府西七十里水經注
渠水蓋今之索河清池水蓋今之清河七虎澗
水期水蓋今之東涼河磨河灤河等水皆河南
賈魯河之上源也水經注彭爲高克邑此條上
下文皆止言清不當贅及于彭彭蓋清水之誤
也彭消與軸蓋皆近清之地竝在今中牟縣境
左右者也

漆洧

漆洧漆與洧

傳漆洧兩水名

孟子離婁篇子產聽鄭國之政以其乘輿濟人於漆洧

漢地理志潁川郡陽城陽山洧水所出東南至長平入潁過郡三行五百里

說文潧水出鄭國詩曰潧與洧方汎汎兮洧水出潁川陽城山東南入潁

水經洧水出河南密縣西南馬飲山又東過新鄭

縣南渭水從西北來注之又東過習陽城西折入
于潁

案今渭水出河南密縣西南流至縣南潞爲金
花泉東行爲雙泊河漆水自北來注之又東行
經新鄭縣潁川縣南又東行經鄆陵縣扶溝縣
北入賈魯河南流至西華縣入潁也

齊

齊風

鄭氏譜齊者古少皞之世爽鳩氏之墟周武王伐
紂封太師呂望於齊是謂齊太公地百里里都營

丘在禹貢青州岱山之陰濰淄之野

漢地理志成王滅蒲始以封師尙父齊郡臨淄縣師尙父所封臣攢謂臨淄卽營丘也

案今山東青州府臨淄縣卽營丘也博興卽蒲姑也今昌樂縣東南有五十里有廢營陵城此春秋之緣陵地漢爲營陵縣隋置營丘縣此蓋緣營聲近而轉丘陵義同而易非其地也

獮

還遭我乎獮之閒兮

傳獮山名

漢地理志作嶲注山名字或作猗亦作嶲相逢於嶲山也

案猗山在今山東臨淄縣東南十五里

南山

南山南山崔崔

傳南山齊南山也

孟子告子篇云牛山之木嘗美矣注牛山齊之東南山也

水經注淄水逕牛山西又東逕臨淄縣故城南東得天齊水口水出南郊山下左思齊都賦曰牛嶺

鎮其南者也

案南郊山在今山東臨淄縣東南一十五里一名南野山

汶水

載驅汶水湯湯魯道有蕩

漢地理志泰山郡汶水出萊毋西入濟萊蕪又禹貢汶水出西南入洧桑欽所言

水經注汶水南逕鉅平縣故城東西南流城東有魯道詩所謂魯道有蕩有汶上夾水有文姜臺汶水西南流詩云汶水滔滔

案今汶水出山東萊蕪縣西南流入運河此一水漢志不當再見泰山郡下汶水出萊母西入濟八字蓋衍文也王伯厚引曹氏說謂許氏以爲出琅邪朱虛縣東泰山東至安丘入雒桑欽以爲出泰山萊蕪縣原山西南入濟以爲班孟堅兩存其說夫汶水有二出萊蕪縣原山入濟者乃徐州之汶水出朱虛縣東泰山入濰者乃青州之汶也名同水異班氏故并記之曹氏以爲班氏兩存其說誤也王氏後引曾氏之說是也朱氏以爲在齊南魯北二國之境欲遷就而

合爲一水亦失之至許氏說文旣以汶爲出東
虛東泰山入濰又云桑欽說汶水出泰山萊蕪
西南入洸此誠如曹氏所謂兩存其說矣夫說
文爲字書而非地志可并記而不可兼存許氏
以桑欽所言爲或說則似誤矣齊魯之間有兩
汶水今知詩人所詠乃入洸之汶水而非入濰
之汶水者以入濰之汶水屬齊東境而入洸之
汶水屬魯東境文姜自魯往齊所當經也

魏

魏風

鄭氏譜魏者虞舜夏禹所都之地在禹貢冀州雷首之北析城之西周以封同姓焉其封城南枕河曲北涉汾水

漢地理志魏國亦姬姓也在晉之南河曲故詩曰彼汾一曲寘諸河之側吳札聞魏之歌曰美哉沔沔乎以德輔此則明主也河東郡河北縣詩魏國案今山西蒲州府治永濟縣東南五里有蒲坂城爲晉河曲卽魏地也

汾沮洳

汾沮洳彼汾沮洳

三言利地卷二
傳汾水也沮洳其漸洳者

大雅韓奕汾王之甥

箋汾王厲王也厲王流於彘彘在汾水之上故詩人因以號猶言宮郊公黎比公也

周禮職方氏冀州其浸汾潞注汾出汾陽

左氏桓三年傳逐翼侯於汾隰注汾水邊釋例曰汾水出太原故汾陽縣東南至晉陽縣西南逕西河平陽至河東汾陰縣入河又僖十六年狄侵晉涉汾及昆都注汾水出太原南入河

漢地理志太原郡汾陽北山汾水所出西南至汾

陰入河過郡二行千三百四十里冀州浸

說文汾水出太原晉陽山西南入河或曰汾陽北
山冀州浸

水經汾水出太原汾陽北管涔山至汾陰北西注
於河

案今汾水出山西靜樂縣管涔山西南流經太
原府太原縣又經祁縣平遙縣又經霍州汾西
縣又經曲沃縣至河津縣入河

河干

伐檀寘之河之干兮

傳干厓也

案山西解州縣芮城縣北五里爲春秋時魏國
其地正在河之陽詩之河干蓋卽在此

唐

唐風

鄭氏譜唐者帝堯舊都之地今日太原晉陽是堯
始居此後乃遷河東平陽成王封母弟叔虞于堯
之故墟曰唐侯南有晉水至于燮改爲晉侯其封
域在禹貢冀州太行恆山之西太原太岳之野至
曾孫成侯南徙居曲沃近平陽焉

案今山西太原府太原縣卽古唐國也

沃鵠

揚之水從子于沃從子于鵠

傳沃曲沃也鵠曲沃之邑也

案今山西絳州聞喜縣東二十里卽桓叔所封之曲沃也鵠蓋其旁邑今不可攷已

首陽

采芡首陽之顛

傳首陽山名也

禹貢壺口雷首

左氏宣二年傳宣子田于首山注首山在河東蒲坂縣東南

括地志雷首山西起雷首東至吳坂坂長數百里
隨地異名

通典雷首在河東縣今山西蒲州府治永濟縣此山凡有八名

歷山首陽山蒲山襄山甘棗山中條山渠諸山獨頭山也

案禹貢雷首左傳首山卽首陽也今名中條山
在山西蒲州府城南三十里

毛詩釋地卷二